

ALAHADY KAREMY 1- TAONA D2019



« Tsy ny mofo ihany no iveloman'ny olona, fa ny teny rehetra avy amin'Andriamanitra »

(Lk. 4: 4)

Ry Kristianina havana, amin'izao Alahady voalohan'ny Karemy izao dia apetraky ny Eglisy mazava amin'ny alalan'ireo vakiteny fa ADY sady DIA ny fiainana. Averimberintsika matetika izany teny izany ary io tokoa no fiainam-pinoantsika. Izao Karemy izao dia fivelomantsika izany finoana izany satria ny fototry ny finoantsika dia ny fitsanganan'i Jesoa ho velona izay hankalazantsika amin'ny Paka. Izao no fotoana antenantsika sy iainantsika izany finoana izany, tsy tany malemy anorenampangady ny finoana fa tany lonaka iasan'ny

fahasoavan'Andriamanitra ka hamokatra be araky ny sitrak'Andriamanitra isika ary sitrany ny hahavelona sy hahasambatra antsika. Izany no mahatonga antsika ho génération mpanorina, ho Eglisy Olona Velona ka hanorina Eglisy Tranon'Andriamanitra. Ry Kristianina

Vakiteny I : Det. 26: 4 - 10

Tononkira : Salamo 91

Vakiteny II : Rom. 10: 8 – 13

Evanjely : Lk. 4: 1 – 13

havamalala, amin'izao Alahady voalohan'ny karemy izao dia tsy maintsy miatrika ireo fakam-panahy isika na manao akory ny fiainantsika, manana ohatra velona isika dia i Jesoa izay niady koa tamin'ny fakam-panahy araky ny henontsika ao amin'ny Evanjely. Rehefa vita batemy izy nentin'ny Fanahy masina dia niatrika izany fakam-panahy izany « *Tamin'izany andro izany i Jesoa dia feno ny Fanahy Masina ary niverina avy tany Jordany ka nentin'ny Fanahy tany an'efitra efapolo andro, sady nalain'ny devoly fanahy Izy, no tsy nihinana na inona na inona nandritra izany andro izany; ka noana nony tapitra izany.* ». Manamporofo fa nandray ny rofintsika rehetra tokoa i Jesoa

Raha miaina ny maha zanak'Andriamanitra antsika isika dia tsy maintsy misedra izany fakam-panahy izany, tsy hoe isika mitady fijaliana na fahorianana, sanatria izany ! tsy mitady antsika hiaina ao anatin'ny fahorianana Andriamanitra. Raha nampianatra vavaka I Jesoa tsy nampianatra antsika hoe "omeo anay anio ny fahorianay isanandro" fa kosa nivavaka "omeo anay anio ny hanina ho aninay isanandro" dia ny fiainana maha zanak'Andriamanitra. Tsy mandeha hoazy ny fiainana maha zanak'Andriamanitra ary izany no sedraintsika amin'izao karemy izao fa indrindra ireo izay miofana atao batemy. Ady sady Dia ny maha génération mpanorina antsika génération manorina fiainambavoao amin'i Kristy vokatry ny fibebahana, Izany hoe : Ady amin'ny ratsy, amin'ireo zavatra rehetra manapotika ny fiainantsika sy ny fifandraisantsika amin'ireo zava-boaary sy ny tontolo iainana, Ady amin'ny ratsy manapotika antsika eo anivon'ny tontolom-piaainantsika, ireo fakam-panahy mikiky ny fiainantsika izay avy amin'ny tontolomp-piaainana, ny rafitra lo mitarika antsika amin'ny ratsy satria isika no manangana ireo haratsiana maro manimba antsika, ka izao vanimpotoany karemy izao dia harodantsika ireo ratsy ireo, ireo RAFI-PAHOTANA ireo ka tontolom-piaainana vaovao miaraka amin'i Jesoa mitsangan-ko velona no hiainantsika, tontolom-piaainana misy an'Andriamanitra, Ady amin'ny ratsy ka mankany amin'ny fiainam-baovao amin'ny Paka.

Izany no ampianarin'ireo vakiteny amintsika androany amin'izao Alahady voalohan'ny karemy izao, izay azo antsoina hoe Alahady fiadiana amin'ny fakam-panahy ka mitondra antsika mankany amin'ny fiainam-baovao.

Ady amin'ireo fakam-panahy 3 izay mikiky ny fiainantsika :

Ny voalohany dia ny fitiavan-tena izay nisedrain'I Jesoa ka namaly ny fhavalohoe : "tsy ny mofo ihany fa ny tenin'Andriamanitra hoy I Jesoa" rehefa nalain'ny demony fanahy hanova ny vato ho mofo izy. tandindon'ny fitiavan-tena ny mofo, ny kibo no no ataon'ireo tia tena ho Andriamanitra, ny sakafomanambara fitiavan-tena. Ampianarin'i Jesoa isika hiady amin'izany fakam-panahy izany raha namaly hoe tsy ny mofo ihany no mahavelona fa ny Tenin'Andriamanitra. Jesoa nanavotra antsika dia nanaiky ho tonga olombelona na dia tsy mpanota aza izy fa nanaiky niady amin'ny fakam-panahy mba hanahafantsika miady amin'ny fakam-panahy. "Tsy ny mofo ihany fa ny tenin'Andriamanitra", Hiezaka isika ka ny ezaka ataontsika dia manambara fa indrindra amin'izao isika mivelona ny toro-làlana avy amin'ny filan-kevitra pastoraly izao fanatonana an'Andriamanitra. Aoka hametraka ny Baiboly eo anivon'ny fiainantsika isika, aoka ny fianakaviana handray ny tenin'Andriamanitra eo anivon'ny fiainany, aoka hamaky ny Tenin'Andriamanitra sy handalina ary hiaina izany. Katolika aho ka halaliniko izay hinoako, manambara ny làlan-kombana ny famakiana ny Tenin'Andriamanitra ka mazotoa mamaky azy.

Ny fakam-panahy faharoa nanjo an'I Jesoa sy manjo antsika dia isika mitady hanompo Andriamaninkafa, noho ny fahasoratam-piaainana dia mitady hampifangaro zavatra isika ka mandeha amin'ny toerana tsy tokony aleha matetika ka very fanahy mbola velona. Antintraterin'I Jesoa àry fa ny Tompo Andriamanitao no hivavahanaao. Aoka isika amin'izao karemy izao hiverina ao amin'ny Tompo araky ny voalazan'ny pretra amintsika tamin'ny fanesorana lavenona "Mibebaha ary minoa ny Evanjely". Araraotintsika izao fotoan'ny karemy izao, hivavaka tokoa isika, mila fivavahana ny fiainantsika tsirairay, ny fiainam-pianakaviana. Aoka hamerina ny fomba mahazatra dia ny vavaka alohan'ny matory mba hahafahana miady amin'ny fakam-panahy maro fa indrindra izay mety hitranga dia ny fanompoana ny Andriamanin-kafa. Aoka àry handresy an'izany isika ka tsy

hampifangaro zavatra fa indrindra amin'izao karemy izao. Isaky ny asabotsy natontsika eto amin'ny diosezy ho andron'ny fianakaviana, mba hazoto handeha hivavaka miaraka ny fianakaviana isika ary ny Alahady rahateo natokana hivavahana hanatonantsika an'Andriamanitra bebe kokoa.

Ny fakam-panahy fahatelo nanjo an'i Jesoa sy manjo antsika koa dia ny fitadiavana voninahitra, lazain'I Jesoa mba tsy haka fanahy ny tempoz Andriamanitraise ianao, hifikitra sy hanompo an'Andriamanitra. Tsy ny voninahitra ny tena no tadiavina fa ny voninahitr'andriamanitra ary hikatsaka mandrakariva ny soa iombonana ka hivelona ny fiainana maha zanak'Andriamanitra. Io fakam-panahy fahatelo io dia ny fitadiavana ny tany malemy hanorenam-pangady. Isika mitady voninahitra dia manilika ny hafa, manao risoriso sy lainga ary fihatsaram-belatsihy. Aoka hanaraka ny lalan'ny hazo fijaliana isika izay lalan'na mitondra amin'ny famonjena, ny fifikirana amin'I Jesoa dia hahafahantsika miady amin'ireo fakam-panahy dia ny fitiavan-tena, ny avonavona, ny lainga sy ny fitapitaka. Ady sady Dia ny fiainana. Ny Dia dia ny fibanjinantsika an'i Jesoa mifantsika amin'ny hazo fijaliana ka aoka isika hifantsika miaraka aminy izany hoe hivelona ny finoana. Io no ambaran'ny vakiteny voalohany boky ny Deteronomy miaiky ny finoany ny vahoaka voafidy ka ho voavonjy. Antintraterin'ny vakiteny faharoa koa izany ao amin'ny taratasy nosoratan'I Md Paoly, raha mino an'i Kristy dia ho voavonjy. Ny finoana ao am-po sy am-pahamarinana dia hahazoantsika famonjena. Hararaotintsika izao vanimpotoan'ny karemy izao mba hifikirantsika amin'I Jesoa, handresentsika ny ratsy ka entintsika ao ampontsika ao Izy, tsy ny fitafiantsika no rovitintsika fa ny fontsika, esorintsika ireo "encombremens" maro isankarazany vokatry ny fakam-panahy, olombelona isika miloloha lanitra ka mety ho lena, mandia tany ka mety ho solafaka. Enga anie mba hanararaotra izao fotoana karemy izao isika mba hiombonantsika amin'i Jesoa, amin'ny alalan'ny fiainana maha zanak'Andriamanitra amin'ny fanaovana ny soa, amin'ny famolahantena ary indrindra amin'ny alalan'ny vavaka. Ivelona ireo asan'ny Famindrampo isika hanehoantsika ny fibebahana.

Ry Jesoa Tompo ô, ampio izahay mandritra izao karemy izao mba ho afaka amin'ireo fakam-panahy mila handrendrika anay, ireo harenan'ny tany mamitaka anay, afaho izahay tsy ho raikitra amin'ireny harena izay mamitaka anay ireny, afaho amin'ny voninahitra mety handrendrika anay, enga anie ny fonay ho feno anao mandrakariva ka hanjakanao anie ny fonay ka hahay hampanjaka ny fahamarinana sy ny tena fifankatiavana marina izahay, hampanjaka ny rariny sy ny hitsiny, hikatsaka mandrakariva ny soa iombonana ka zary EOV manorina ETA izahay, hitondra anay tokoa amin'ny Paka izay antenainay hitondra fiadanana sy fiainam-baovao ho anay tsirairay, ny fianakaviana, ny fiaraha-monina, ny firenenay ary izao tontolo izao. Amen

Mompera Arsevka Benjamin Ramaroson